

TEZAU LITURGIC
24 DECEMBRIE

ACATISTUL
SF. PREOT-MUCENIC
SERGHIE MECEV
DE LA
MOSCOVA



MOSCOVA, 2000



Акафист

священномученику Сергию, пресвитеру Московскому

Кондак 1

Избранный служителю Христов, во дни гонений
в сонме новомучеников просиявый,
страстотерпче и исповедниче, отче Сергие; ты
бо взявши Крест свой к подвигу неуклонно
шествовал еси спасительною стезею, темже, яко
имея велие дерзновение ко Господу, моли
спастися нам, чадом твоим, да с верою зовем
ти:

Радуйся, священномучениче Сергие, пастырю
Богомудре.

Икос 1

Ангелов Творец и Содетель всея твари, спасти
хотя страну нашу, пред грядущим бедствием
предпосла в мир мерный служители Своя,
святыя страдальцы, к подвигу мученическому
приуготованныя. К сему высокому служению от
рождения призван был еси и ты, преславне
Сергие, яко благий плод от древа добраго, в
вере, надежде и любви прозябший. Тем же и мы,
премудрость Всевышняго славяще, гласом
радования воспеваем ти сице:

Радуйся, отроча Богом избранное;
Радуйся, измлада в вере наставленный.
Радуйся, к горнему ум вперивый;
Радуйся, высоту службы церковныя сердцем познавый
Радуйся, сослужителю верный старца святаго;
Радуйся, достойный сыне того и преемниче.
Радуйся, драгоценный сосуде, благодати исполненный;
Радуйся, святости отца твоего наследниче.
Радуйся, священномучениче Сергие, пастырю Богомудре.

Кондак 2

Видя пастырское служение родителя твоего, праведного Алексия, в горении ко Господу и жертвенней любви к людем неослабевающее, близость Божию яве познал еси и крепко в вере и добродетели утвердился еси, со святым старцем поя согласно Богу: Аллилуиа.

Икос 2

Разумом чистым разумея пагубу лжеучений богоборческих, на защиту веры и Церкви со всею Русью Святою всеоружно стал еси, темже, ужасаяся и благоговей пред силою Вседержителя велий сонм святых в земле нашей явльшаго, поем ти сицевая:
Радуйся, щедро от Господа дарованиями

исполненный;

Радуйся, вся сия на служение Ему поставивый.

Радуйся, от пути, уготованного тебе, не
уклонивыйся;

Радуйся, яко в годы гонений иго пастырского
служения подъял еси.

Радуйся, учениче святых отец усердный,

Радуйся, в делании духовном ревностно
подвизавыйся.

Радуйся, яко выну пред Богом ходити навыкл
еси;

Радуйся, верность Христу до конца
сохранивый.

Радуйся, священномучениче Сергие, пастырю
Богомудре.

Кондак 3

Силою данною ти свыше, превысшую сил
человеческих ношу подъял еси, отче, по
преставлении старца Алексия взем общину им
созданную на рамена своя; потщался еси узами
любве Христовой во едину семью человецы
связати, да в покаянии и служении Богу
пребывающе, едиными усты славят Того:
Аллилуиа.

Икос 3

Имеяй велие попечение о пастве, Богом ти
вверенней, нужды чад своих принимал еси яко

своя, семена добродетелей усердно сея в сердца их, молитвою и слезами обильно орошая, в терпении плод возрастил еси. Мы же, видяще общину твою, верность Христу и единение в годы гонений сохраншую, благодарственная воспеваем ти:

Радуйся, возделателю благонравия;

Радуйся, щедрый и любвеобильный пастырю.

Радуйся, иконописания и пения церковного рачителю;

Радуйся, устава Богослужбнаго ревнителю.

Радуйся, истины богословия сердцем познавый;

Радуйся, в вере и богопознании чада твоя утверждавый.

Радуйся, яко жития святых деяньми читати научал еси

Радуйся, яко величайшую тайну богослужения изъяснял еси.

Радуйся, священномучениче Сергие, пастырю богомудре.

Кондак 4

Бурю ветров злых на Святую Церковь веющих, благодатию учения святоотеческого разгонял еси, отче премудре, уча в службе церковней спасительное пристанище обретати; превыше бо мира сия служба есть и вводит в небесная, идеже ангелы со святыми воспевают Богу:

Аллилуиа.

Икос 4

Слышаша людие, правды ищущий,
проповедниче богоизбранный, огненные словеса
твоя благодати исполнены в вере и любви ко
Христу утверждахуся, тебе же похвальная пояху
так:

Радуйся, Церковь, яко Тело Христово
исповедавый;

Радуйся, к соединению во Христе в таинствах
призывавши.

Радуйся, яко живущим в мире дольнем путь ко
спасению указуеши;

Радуйся чрез богослужение с миром горним
соединяться духом научаеши.

Радуйся, светильниче горящий, на высоту
вознесенный;

Радуйся, яко просвещавши души наша светом
премирным.

Радуйся, витие богодухновенный, учение
отеческое о праздниках церковных ясно
изложивый;

Радуйся, яко к радости духовней нас
приобщавши.

Радуйся, священномучениче Сергие, пастырю
богомудре.

Кондак 5

Богопротивное лжеучение, единство Христовой
Церкви раздирающее, попусти Господь

распространити; волцы во шкурах овчих, алчущих расхитити стадо церковное, обретошаша, непоколебима защитника православных догматов и верна последователя святых отец, небоязненно коварство тех обличающа, Бога же Единого в Троице славяща: Аллилуиа.

Икос 5

Видеша людие ревность и мужество новомучеников и исповедников, за чистоту Православия и Святую Церковь кровь изливающих, гласу совести следовати ревноваху, обольщения отвергше. Мы же, лукавству мира сего подверженнии, твоею неустрашимою верностию научаемся не малодушествовати, пред Богом же ходити, благодарно ти вопиюще: Радуйся, яко совесть неблазну хранил еси; Радуйся, гласу ея присно внимал еси. Радуйся, яко приятием богопротивных законов тую не осквернивый; Радуйся, лукавство врага посрамивый. Радуйся, Святыя Церкви гонимыя защитниче; Радуйся, Православныя веры поборниче. Радуйся, непоколебимый столпе догматов церковных; Радуйся, премудрый обличителю ересей лукавых. Радуйся, священномучениче Сергие, пастырю Богомудре.

Кондак 6

Проповедниче велегласный, ты, славный пастырю Божий, показался еси во дни богоотступничества и гонения на Церковь Русскую. Умножающимся гонением усугубися и ревность твоя, и горение духа; малый же храм твой - велия крепость и прибежище спасения обретеса, идеже песнь верных торжествующе воспеваема бысть: Аллилуиа.

Икос 6

Возсиял еси светом Божественным, Сергие досточудне, егда приуготованный ти венец мученический со смирением приял еси; заключение и изгнание понесл еси, благодаряще Зиждителя. Темже сердцем умиляся, воспеваем ти тако:

Радуйся, в руце Божий душу твою вверивый;
Радуйся, благодарно приемый гонения и скорби.

Радуйся, яко молитвою телесныя твоя болезни утолял еси;

Радуйся, яко и наши болезни молитвою врачуеши.

Радуйся, блаженне, правды ради изгнанный;
Радуйся, мзду на небеси улучивый.

Радуйся, узы и горькия работы многолетне терпевый;

Радуйся, яко пройдя сквозь велия страдания

покоя желанного достигл еси.

Радуйся, священномучениче Сергие, пастырю Богомудре.

Кондак 7

Хотя истину утвердiti чистоту веры Христовой оградiti, Сергие преславне, поборниче правды, верность Русской Церкви Православней свидетельствовал еси, со архиереи верными и во изгнании радостно возглашая: Аллилуиа.

Икос 7

Нового тя богослова и исповедника, древним подобнаго, дарова Господь людем Своим, преславне Сергие, аще и в темнице пребывая, обаче любовию Христовою всех объемля, возвышал еси апостольски глас твой, призываяй веру хранити и заповедем Господним следовати. Темже прославляем тя сице:

Радуйся, старцев Оптинских послушниче;

Радуйся, Святейшаго Патриарха Тихона преданный последователю.

Радуйся, святых исповедников друже верный;

Радуйся, светильниче светлый, горяй любовию ко Христу.

Радуйся, малодушных укрепителю;

Радуйся, яко изгнание и узы, духом торжествуя, воспел еси.

Радуйся, дар Духа Святаго, ведати сокровенное,

стяжавый;

Радуйся, яко по смирению прозорливость
недугом мнел еси.

Радуйся, священномучениче Сергие, пастырю
Богомудре.

Кондак 8

Странное чудо видим на тебе исполняемое,
досточудне отче, егда на путь страданий вступи,
ко святым Иоанну Златоусту, Феодору Студиту,
такожде горце гонимым, усердно взывал еси,
обаче уверение в правости пути твоего получил
еси, Богу поя: Аллилуиа.

Икос 8

Весь благодатных дарований исполнен, течение
временныя жизни в лишениях и работах тяжцех
совершая, исповедниче славный, духом от силы
в силу возрастал еси, се бо от пастырскаго
делания к мученическому подвигу веде тя
Господь. Сие Божие о тебе благоволение
славяще, поем ти сице:

Радуйся, семена добрыя в сердца чад твоих
сеявый;

Радуйся, в горниле страданий вкупе с ними
духом возраставый.

Радуйся, души человечестии, яко зерна мнози во
един хлеб в купножителстве соединивый;

Радуйся, сердце твое отверзе, прияти души,

Богом врученныя тебе
Радуйся, неустанный делателю на ниве
Христовой;
Радуйся, слезами начатки добродетелей в душах
человеческих возрастивый.
Радуйся, яко семя в земли умершее, в чадах
умноживыйся;
Радуйся, яко и ныне не престаеши плодоносити.
Радуйся, священномучениче Сергие, пастырю
Богомудре.

Кондак 9

Все естество ангельское удивися вся могущей
сотворити силе Божией, како человецы плоть
носящии на диавола вооружишася, како мучими
за исповедание веры, духом веселяшеся, како
земля наша кровию святых очистися и Русь
Святая паки воста, возглашающе победную
песнь: Аллилуиа.

Икос 9

Витийствовати изнеможе язык человекь силу
Божию, во святых Его действующую во вся
времена чудесы многими, паче недоумеем
величие подвига сродников наших яже в
последняя времена в земли Русской просияли
есте, аще тии подобни нам человецы быша, како
глад, жажду, наготу, биение и поругание
благодаряще Бога терпеша, в муках и болезнях

не перестающе славить Господа и ближним
служить. Вкупе со святыми прославляем и отца
нашего Сергия, с любовью зовуще:

Радуйся, верный друже Христов;

Радуйся, яко службу Богу чрез служение
ближним совершал еси.

Радуйся, от отца своего жертвенную любовь к
словесным овцам унаследовавый;

Радуйся, евангельскою любовью тех до конца
возлюбивый.

Радуйся, яко в заточении молитвы о сиротах
твоих непрестанно возносил еси;

Радуйся, яко и ныне молитвенно руке за ны
простиравши.

Радуйся, яко Господа ради не пощаде живота
своего;

Радуйся, душу свою за други своя положивый.

Радуйся, священномучениче Сергие, пастырю
Богомудре.

Кондак 10

Спасти хотя душу, блаженне отче, путем веры
неуклонно шествовал еси, вера бо, рекох,
готовность есть умереть за Христа; молитвою
таковую веру стяжав, смирением и чистотою
совести, непрестанно славил еси Господа, поя
Ему: Аллилуиа.

Икос 10

Стена еси и ограждение неборимое всем с верою к тебе прибегающим, отче Сергие; ты бо неложно показался еси верный служитель Христов, егда по мнозех летех изгнания ко страданию крестному приближися. В руке Божии живот свой предал еси, яко агнец на заклание ведом. Темже, зряще величие души твоя, воспеваем ти:

Радуйся, чрез блаженную старицу путь твой предуведый;

Радуйся, яко тою священномучеником пронареченный.

Радуйся яко темницу и смерть яко затвор и схиму восприял еси;

Радуйся, яко молитвою к тому себе приуготовивый.

Радуйся, яко Предтече Господню, обличителю беззаконий подражателю;

Радуйся, в день рождества сего великаго Пророка во узы заключенный.

Радуйся, якоже и той, в темнице умерщвленный;

Радуйся, яко от смерти к вечному животу прешедый.

Радуйся, священномучениче Сергие, пастырю Богомудре.

Кондак 11

Пение всеумиленное воспеваает яко вышше всех добродетелей любви есть. Любы, якоже глаголет апостол, вон изгонит страх. Ты же, о возлюбленне наставниче наш, отче Сергие, силою любви твоея ко Спасителю далече отринул еси страх от души твоея, духом бодрым возшед на крест. Тем же молим тя, помози и нам воспрянути духом, чрез покаяние, труды и терпение от тоя любви вмале вкусити, дабы неосужденно чистым сердцем воспети ангельски: Аллилуиа.

Икос 11

Светоприемный светильник возсиял еси, отче Сергие, житием твоим; мы же хотяще жительству твоему подражати, твоего предстательства пред Господом просим и с любовью взываем ти:

Радуйся, адаманте веры, лютых мучений не устрашйвыйся;

Радуйся, яко вся страдания мужески претерпел еси.

Радуйся, яко услыша Господь молитвы твоя;

Радуйся, яко из вверенных душ тебе никтоже пострада.

Радуйся, яко и смерть не возможе разлучити тя от возлюбленных чад твоих;

Радуйся, яко малое стадо твое Господом Самим

хранимо бысть.

Радуйся, наставниче святой, яко не престаеши
пещися о вверяющих ти ся;

Радуйся, яко присно предстательствуеши за ны
у Престола Святыя Троицы.

Радуйся, священномучениче Сергие, пастырю
Богомудре.

Кондак 12

Благодать духа обильно излися на главы
верных ученик Христовых, в последняя времена
верность сохранивших Господу в Русской стране;
яже гоними бяху, умерщвляеми за Христа, да не
разлучатся от любви Божия; с ними же и ты,
священномучениче Сергие, в радость Господа
яко верный служитель вшел еси, идеже со всеми
святыми песнь победную воспевавши: Аллилуиа.

Икос 12

Поюще хвалебную песнь, воспеваем страдания
твоя и величаем тя, добропобедне Сергие, яко
воина непобедима венцем мученическим от
Господа увенчанна, безбожных гонителей
поправшаго; ты бо волею в мученическия ризы
облеклся еси; того ради преклонше колена
сердец наших со умилением взываем ти:

Радуйся, прекрасный цвете благоуханный, в
земли нашей процветший;

Радуйся, Церкви Русския украшение.

Радуйся, воине неустрашимый Христов;
Радуйся, победителю, венцем мученическим
увенчанный.
Радуйся, к лику новомученик причтенный;
Радуйся, в сонме святых славно прославленный.
Радуйся, предстателю земли Русския;
Радуйся, неусыпный ея хранителю.
Радуйся, священномучениче Сергие, пастырю
Богомудре.

Кондак 13

О усердный служителю и мучениче Христов,
отче наш Сергие, прими от нас приносимое
тебе моление и твоим всесильным ходатайством
избави ны от враг видимых, паче же от
невидимых, не отступи духом твоим от нас,
пребуди присно наставник наш в жизни сей и
безпреткновенно введи в Небесныя Обители, да
во веки поем Богу: Аллилуиа.

Сей Кондак глаголи трижды и паки Икос 1 и
Кондак 1.



ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО